

COMUNICATO n. 1994 del 27/07/2024

Gester en Gamoasol va Vlarotz der jortrèf

Austoalt de prais en de toalnemmer van drai konkursn ver en bersntolerisch

[Mòcheno] S zil van drai konkursn ist za mòchen veròrbetn van lait materialn va merarer schòrtn as bersntolerisch.

Der konkurs gahoasn “Schrift” ist ver de groasn as tschbinnen ont schraim gschichtn va mearer schòrtn oder poesin. Der doi konkurs kimm gamòcht sait oa’dlef jarder ont haier sai’ gem kemmen zboa earstn prais, de Goldvedern, ver de sezion Poesia ont an prais gahoasn Silberveder ver de prosa. Van temen as gahòndelt kemmen sai’ haier, der prauch van tònz ont a gschicht pet abia protagonist an burm as brumpelt.

An òndern konkursn, as se hoast Schualer ont student, kimm gamòcht ver schualer ont studentn. Haier hom toalganommen vinf òrbetn ont van doin òlla de klassen va de Earsteschual va Vlarotz as hom gem vòrb en de tèkstn pet zoachen ont pilder.

Dòra, der dritte konkurs ist dersèll gahoasn Filmer ver de audiovideo. Der earste prais ist kemmen gem en kurzfilm “Schoa’ zeichen jor” as gadenkt de figur van Diego Moltrer, òltpirgermoaster ont President van Regionalrot as storm ist vour zeichen jarder.

De drai konkursn sai’ augòngen ont hom se verraichert pet de zait. Konkursn lai ver zoachen as gahòp hom s zil za hèlven en de schual za gem bèrt en sèll as do hòt, en de kultur- ont sprochen pahalter as de bersntoler gamoa’schòft hòt, sai’ araukemmen van Institut schoa’ en de 90er jor. Van earstn jarder van Zboatausnt hòt men gabellt pesser strukturiarn de òrbetn zòmm pet de schual ont asou ist augòngen en 2003 der konkurs ver de studentn as ober nou mear as ònderst s zil gahòp hòt za gem bèrt en de gschicht ont en de kultur va de bersntoler gamoa’schòft. Schoa’ zboa jarder derno der konkurs ist kemmen gamòcht ver de schualer aa ont hòt se òlbe mear keart za gem bèrt en de tschrim sprochen aa bavai s ist òlbe mear pakònt kemmen de schrift standard iberhaup en de schual. Enderbail de technik ist envire gòngen ont s ist òlbe laichter kemmen za meing mòchen selber filmen ont asou ist kemmen araugem der konkurs Filmer bo as pfrokt kimm en de stimm ont en de dialogn za prauchen mear as ònderst s bersntolerisch. De zaitn sai’ raif kemmen ver za prauchen òlbe mear de schrift ont asou ist araukemmen der konkurs Schrift ver za untestitzn ont veròrbetn tèkstn as derstelln an earstn tritt ver a bersntoler- literatur.

De inizitf ist kemmen òlbe untestitzt va de Autonome Region Trentin-Sudtirol.

(It)